

## **He Ho'olaule'a I Ke Kaiāulu Me Ka Mo'omeheu O Ke Aloha**

'Elua mea ahuwale e ho'opili ana i nā kānaka o Hawai'i – nā kai 'ewalu e pili ai nā moku, a me ke aloha e pili ai kākou me ka honua. E ho'ohanohano 'ia ana ia mau mea 'elua ma ka hanana Aloha Festivals kūmakahiki 72. 'O ka mākia o kēia makahiki 'o "No Ke Kai Kākou Ē," he mahalo i ke kai me ka ho'opa'a pū i ko kākou kuleana e mālama i ke kai no nā hanauna e hiki mai ana.

'O ka papahana wehena ka mua e mālama 'ia ma ka lā 1 o Kepakemapa ma Helumoa, ka Royal Hawaiian Center ma Waikīkī. 'O ka Ho'olaule'a ka hanana nui ma hope mai, kahi e hui ai nā kini a lehu ma ke Alaākea Kalākaua me nā mele, mea'ai, hana no'eau a lei ma ka lā 22 o Kepakemapa. A 'o ka paikau ma Waikīkī ma ka lā 29 o Kepakemapa ka paikau nui loa ma Hawai'i i kēlā me kēia makahiki, e ho'ohanohano ana i ke kaiāulu, ka nani o nā hui paikau, a me nā hui holo pā'ū.

He 100,000 a 'oi ka nui kānaka e nanea ana i ka Aloha Festivals i kēlā me kēia makahiki, a ha'aheo ka HTA i ke kāko'o i ia mau hanana ma ke kūlana hiehie he Signature Event. E 'imi i ka papamanawa piha a me ka 'ike hou ma [AlohaFestivals.com](http://AlohaFestivals.com).